

Na osnovu člana 19. stav 1. Zakona o Vladi Federacije Bosne Hercegovine ("Službene novine Federacije BiH", broj 1/94, 8/95, 58/02 i 19/03) člana 194. stav 3. i člana 310. stav 1. Zakona privrednim društvima ("Službene novine Federacije BiH", broj 23/99, 45/00, 2/02, 6/02 i 29/03), Vlada Federacije Bosne i Hercegovine, na svojoj 118. sjednici održanoj 14. jula 2005. godine, donosi

**UREDBU
O VRŠENJU OVLAŠĆENJA ORGANA FEDERACIJE BOSNE I
HERCEGOVINE U PRIVREDNIM DRUŠTVIMA SA UČEŠĆEM DRŽAVNOG
KAPITALA**

Član 1.

Ovom uredbom uređuje se nadležnost organa Federacije Bosne i Hercegovine u predlaganju kandidata za članove nadzornog odbora u privrednim društvima sa državnim kapitalom i izdavanje punomoćja za prisustvo u radu skupština u ovim privrednim, društvima kao i obaveze predstavnika državnog kapitala povodom učešća u radu navedenih organa koji proizilaze iz osnova prava vlasništva države nad tim kapitalom.

Član 2.

Nominiranje kandidata za imenovanje članova nadzornog odbora u privrednom društvu iz člana 1. ove uredbe vrši se na temelju prethodno provedenog postupka predviđenog Zakonom ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03) i Zakona o sukobu interesa u institucijama vlasti Bosne i Hercegovine ("Službeni glasnik BiH", br. 13/02, 16/02, 14/03 i 12/04).

Predlaganje kandidata koji su zadovoljili uslove konkursa, a na temelju prijedloga komisije, vrši Vlada Federacije Bosne i Hercegovine, ako je to predviđeno posebnim zakonom, ili nadležni federalni ministar.

Član 3.

Kandidat za člana nadzornog odbora ne može biti lice kod kojeg postoje zapreke iz odredaba člana 260. Zakona o privrednim društvima.

U privrednim društvima koja obavljaju djelatnosti javnog društvenog interesa, kao i u privrednim društvima u kojima Federacija Bosne i Hercegovine ima udio u vlasništvu od najmanje 50% plus jedna dionica i koja zapošljavaju preko 50 radnika, kandidat za člana nadzornog odbora ne može biti lice kojeg isključuju odredbe Zakona o javnim preduzećima u Federaciji Bosne i Hercegovine ("Službene novine Federacije BiH", broj 8/05).

U privrednim društvima iz stava 2. ovog člana, član nadzornog odbora je dužan pridržavati se odredaba Zakona o javnim preduzećima u Federaciji Bosne i Hercegovine (posebno odredaba čl. 7, 8, 14, 19 i 20.).

Član 4.

Za člana nadzornog odbora ne može biti nominiran ili kao punomoćnik u skupštini privrednog društva ne može biti opunomoćen:

1. direktor ili zamjenik direktora privrednog društva u kojem država vrši ovlaštenja po osnovu državnog kapitala,
2. članovi Federalne ili kantonalnih vlada,
3. nosilac pravosudne funkcije ili nosilac druge funkcije čije je vršenje po zakonu nespojivo sa učešćem u radu organa iz ove uredbe,
4. dioničar ili vlasnik udjela u društvu ili je u bilo kojem drugom obliku sukoba interesa u ličnim ili profesionalnim odnosima utvrđenih Zakonom o sukobu interesa u institucijama vlasti Bosne i Hercegovine i Zakonom o javnim preduzećima u Federaciji Bosne i Hercegovine, 5. lice koje ne zadovoljava standarde i kriterije iz člana 7. stav 1. Zakona o ministarskim, vladinim i drugim imenovanjima Federacije Bosne i Hercegovine.

Član 5.

Isto lice ne može istovremeno biti predsjednik ili član nadzornog odbora u više od dva privredna društva uključujući u taj broj i članstvo u upravnim odborima pojedinih državnih ili federalnih agencija.

Odredba stava 1. ovog člana ne može se primijeniti na lica koja bi imenovanjem u drugom nadzornom odboru ili kaopunomoćnik u radu skupštine privrednog društva došla u sukob interesa sa izvršenim imenovanjem u određenom privrednom društvu odnosno izdavanjem punomoćja za učešće u radu skupštine.

Član 6.

Federacija Bosne i Hercegovine, saglasno članu 261. stav 1. Zakona o privrednim društvima preko svojih organa vrši prava iz člana 1. ove uredbe u privrednim društvima u kojima je država dioničar sa najmanje 5 % dionica u tom društvu.

Ovlaštenje iz stava 1. ovog člana država vrši i u društvima sa ograničenom odgovornošću ako njen udjel iznosi najmanje 5%kapitala društva.

Član 7.

Lista privrednih društava u kojima država vrši ovlaštenja iz člana 1. ove uredbe čini sastavni dio ove uredbe.

Član 8.

Nominiranje kandidata za članove nadzornog odbora federalni organ (Vlada Federacije Bosne i Hercegovine ili nadležno ministarstvo) vrši u onolikom broju lica koji odgovara srazmjeri učešća državnog kapitala u ukupnom kapitalu privrednog društva.

Član 9.

Član nadzornog odbora imenovan kao predstavnik državnog kapitala dužan je prije održavanja sjednice tog organa pribaviti mišljenja federalnog organa ako taj organ razmatra pitanja iz člana 269. tač. 3., 5., 6., 7. i 11. Zakona o privrednim društvima.

Mišljenje organa iz stava 1. ovog člana dužan je pribaviti član nadzornog odbora u privrednom društvu iz člana 3. stav 2. ove uredbe ako nadzorni odbor treba da odlučuje o pitanjima iz člana 8. pod b) do h) Zakona o javnim preduzećima u Federaciji Bosne i

Hercegovine.

Bez pribavljenih mišljenja iz st. 1. i 2. ovog člana, član nadzornog odbora ne može učestvovati u odlučivanju tog organa.

Izuzetno od odredbe stava 3. ovog člana, član nadzornog odbora može glasati na sjednici ukoliko do datuma održavanja sjednice nije dobio traženo mišljenje nadležnog organa.

Član 10.

Federalni organ imenuje punomoćnika državnog kapitala za skupštinu privrednog društva iz člana 6. ove uredbe.

Prilikom odlučivanja u skupštini privrednog društva punomoćnik raspolaze ukupnim brojem glasova koji pripada državnom kapitalu.

Prije odlučivanja u skupštini imenovani punomoćnik je dužan pribaviti mišljenje organa koji je izdao punomoćje o pitanjima iz člana 246. tač.1 do 16. Zakona o privrednim društvima.

Bez pribavljenog mišljenja o pitanjima iz stava 2. ovog člana, punomoćnik ne može odlučivati u skupštini.

Izuzetno od odredbe stava 4. ovog člana punomoćnik može punopravno odlučivati ukoliko do sjednice nije dobio traženo mišljenje nadležnog organa.

Član 11.

Pribavljanje mišljenja iz čl. 9. i 10. ove uredbe vrši se pismeno najkasnije sedam dana prije održavanja sjednice nadzornog odbora odnosno skupštine a u izuzetnim slučajevima, ako se to ocijeni opravdanim, usmenim putem.

Usmenu saglasnost o pojedinim pitanjima iz stava 1. ovog člana može isključivo dati član vlade čije ministarstvo vrši ovlašćenja po osnovu državnog kapitala.

Član 12.

Član nadzornog odbora i punomoćnik u skupštini odgovorni su za svoj rad organu koji ga je nominirao i imenovao odnosno koji je izdao punomoćje.

Predsjednik ili član nadzornog odbora pored odgovornosti iz stava 1. ovog člana za svoj rad odgovaraju prema odredbama čl. 270. do 274. Zakona o privrednim društvima.

Član 13.

Do utvrđivanja Liste privrednih društava iz člana 7. ove uredbe primjenjivaće se Lista iz člana 2. stav 2. Uredbe o vršenju ovlašćenja i obaveza organa Federacije Bosne i Hercegovine u privrednim društvima po osnovu državnog kapitala ("Službene novine Federacije BiH", br. 8/00, 40/00, 43/00, 4/01, 5/01, 26/01, 35/01, 13/02, 14/02, 68/02, 56/03, 72/04 i 10/05) osim na ona privredna društva koja su u međuvremenu u cijelosti privatizirana.

Prečišćen tekst Liste iz stava 1. ovog člana pripremiće se u roku od tri mjeseca i dostaviti Vladi Federacije Bosne i Hercegovine na verifikaciju.

Član 14.

Na osnovu pravila utvrđenih ovom uredbom, kantoni će donijeti odgovarajući propis kojim će utvrditi ovlašćenja u privrednim društvima po osnovu državnog kapitala u kantonu i opštinama na njihovom području.

Član 15.

Stupanjem na snagu ove uredbe prestaje da važi Uredba o vršenju ovlašćenja i obaveza organa Federacije Bosne i Hercegovine u privrednim društvima po osnovu državnog kapitala ("Službene novine Federacije BiH", br. 8/00, 40/00, 43/00, 4/01, 5/01, 26/01, 35/01, 13/02, 14/02, 68/02, 56/03, 72/04 i 10/05), izuzev Liste privrednih društava iz člana 13. ove uredbe.

Član 16.

Ova uredba stupa na snagu narednog dana od dana objavljivanja u "Službenim novinama Federacije BiH".